

Universal Declaration of Human Rights - Walloon

© 1996 – 2009 The Office of the High Commissioner for Human Rights

This HTML version prepared by the *UDHR in Unicode* project, <http://www.unicode.org/udhr>.

DÉCLARÂCION UNIVERSÈLE DÈS DREÛTS D'L'OME

[Preamble]

Il a stu ad'mètu 'ne fèye po totes

Qui l'fondemint dè-l'libètè, dè-l djustice èt dè-l'pàye tot-avâ l'monde, c'èst l'rik'nohnance dè-l'dignité qu'èst l'prôpe di tos lès-omes èt dèl dreûts égâls qu'ils ont èt qu'on n'èlzi pout mèskeure;

Qui l'fèt' dè n'in rik'nohe ou dè foler âs pîds les dreûts d'l'ome ont k'dû sacwants a rabahî èt brutâlizer l's-ôtes d'ine tèle manière qui l'consyince di l'ûmanité ènn'a stu révoltêye;

Qui l'pus grand èspwér dèl djins, c'èst l'avén'mint d'on monde wice qui lès-omes sèront libes dè djâser èt dè creûre, tot-z-èstant d'halés dè-l'sogne èt dè-l'mizère;

Qui lès dreûts d'l'ome divèt-èsse ptotéjés d'on rèdjime di dreût di tèle dôrt qui l'ome ènn'arive nin a l'rèvole disconte l'abus dè pouvwér èt l'assèrvih'mint, fâte d'aveûr situ aconté èt après aveûr tot fèt po-z-èsse rik'nohou;

Qu'i fât mète èn-avant, â-d'-dizeûr di tot, l'amitié inte lès peûpes èt les nâcions;

Qui lès peûpes dèl Nâcions-Unies ont volou r'dîre chal leû fwé divins lès dreûts naturéls di l'ome, divins l'dignité èt l'valeûr dèl djins, divins l'égâlitè dèl dreûts inte lès-omes èt lès feumes, èt qu'il ont dit leû vol'té dè fé tot po mète èn-alèdje li progrès sociâl èt po mète è plèce dèl todi mèyeûzès condicions dè viker divins 'ne libèrté todi plus grande;

Qui lès-Etats Mambes s'ont-st-égadjî a mète èn-ouve po d'bon li rèspèt dèl dreûts d'l'ome èt d'sès vrêyes libèrtés tot-avâ l'monde, avou on côp di spale di l'Organizâcion dèl Nâcions-Unies;

Qu'ine minme îdèye di cès dreûts èt d'cès libèrtés-chal èst dè-l'pus hôte importance po poleûr tini vrêmint ciste égadj'mint-la.

L'ASSIMBLÈYE GÉNÉRÂLE proclame li prezinte

DÉCLARÂCION UNIVERSÈLE DÈS DREÛTS D'L'OME come èstant lès valeûrs qui tos lès peûpes èt totes lès nâcions divrît mète èn-ouve. Qui lès cis qui t'nèt l'vièrna dèl sôciétés tot comme chaskeun' â rès, avou djoûrmay cisse Dèclarâcion è l'tiesse, sayèsse dè mète èn-avant li rèspèt d'cès dreûts èt libèrtés-chal, divins lès scoles èt l'éducâcion po nn'ariver, pitchote a midjote, grâce a dèl mèzeûres nacionâles èt internacionâles, a 'ne rik'nohnance di cès dreûts èt d'cès libèrtés-la, po qu'i sèyèsse mètous èn-alèdje po d'bon tot avâ l'monde, ot'tant po lès populâcions dèl-Etats Mambes zèl minmes qui po lès cisses dèl tères qui sont d'zos leû k'dûhance.

Artike prumî (1)

Tos lès-omes vinèt-st-â monde libes, èt so-l'minme pîd po çou qu'ènn'èst d'leu dignité èt d'leus dreûts. I n'sont nin fou rêzon èt-z-ont-i leû consyince po zèl, çou qu'èlèzès deût miner a s'kidûre onk' po l'ôte tot come dèl frés.

Artike deûzinme (2)

Chaskeun', seûy-t-i ome ou feume, pout fé valeûr tos lès dreûts èt totes lès libèrtés qui nous sont rachou d'vins l'prezinte Dèclarâcion, èt n'pôrèt-on prinde nouk' po mons qu'i n'èst a cåse di s'race, dè-l'coleûr di s'pè, di s'lingadje, di çou qu'i creût, di sès-îdèyes so-l'politique ou so tot ôte tchwès, di qué pays qu'i provint, di s'condition d'riche ou d'pôve, dè-l'contrêye wice qu'il a vèyou l'djou ou bin d'tot minme qwè qu'i seûye.

Di pus' nolu n'deût pâti dè-l'condicion di s'patrèye rapôrt âs-ôtes payis, qui l'contrêye ou l'payis di d'wice qu'i provint seyèsse indépandants, nin mèsse di zèls po d'bon ou bin rastrindou d'vins leûs dreûts, èt mâgré tot çou qu'on pôreût tûzer di leû gouvèrnumint.

Artike treûzinme (3)

Chaskeun' a dreût a-l'vicârèye, a-l'îberté èt a-l'sûreté po lu minme.

Article qwatrinme (4)

Nolu n'sèrè t'nou come èsclâve ou ovri sins salêre, l'èclavadje di tote sôrt, tot come dè fé martichî dè-sclâves di tot l'minme quéle manîre sont disfindous.

Artike cinquinme (5)

Nolu n'pôrèt-esse mâ trêti, mètou a-l'torteûre, ou rabahi avou dè cruwèlès ponnes nin dègnes d'in-ome.

Artike sihinme (6)

Chaskeun' a l'dreût d'esse rik'nohou tot-avå po çou qu'il èst sorlon si lwè tot come sès dreûts.

Artike sètinme (7)

Turtos sont so-l'minme pîd po d'avant li lwè èt turtos ont dreût d'esse protéjés d'-l'minme manîre pa li lwè. Turtos ont dreût a 'ne minme prôtècion po n'nin èsse mètous so-l'costé d'ine manîre qu'îreût disconte li prezînte Dèclarâcion, mins ossu disconte to çou qu'pôreût miner a garanti onk èt nin l'ôte ou a tote sôrt di préférence.

Artike ûtinme (8)

Chaskeun' a l'dreût d's'aler plinde èt d'esse ètindou po d'bon dè-l'justice compétinte di s'payis, di tot çou qu'sèreût fêt po mète a mâ lès mèsse dreûts qu'li sont rik'nohous dè-l'constitution ou bin dè lwès.

Artike noûvinme (9)

Nolu n'pout-esse sins rézon tchoûki è-l'pote, tinou èprîh'né ou tchèssi fou di s'payis.

Artike dîhinme (10)

Chaskeun' a l'dreût d'esse ètindou d'ine minme manîre, divant tot l'monde èt sins totès fètès-idèyes, divant on tribunâl indépandant èt djusse qui dècid'ré d'sès dreûts ou bin d'sès d'vwérs, tot come li r'vint l'dreût di s'disfinde di çou qu'on li r'proche ou bin d'çou qu'on l'acuse.

Artike onzinme (11)

1. Tot quî è-st-acusé d'ine mâcule deût-esse tinou po ènocint d'çou qu'on li r'proche disqu'a tant qu'i seûye rik'nohou coupâbe, èco fât-i qui s-procès seûye public, qui totes lès règues sèyèsse rèspectèyes èt qu'il âye avou l'dreût di s'disfinde po d'bon.

2. Nolu n'pout-esse condâné po 'ne sacwè qu'il a fêt ou qu'i n'a nin volou fé a on moumint wice qui, sorlon lès lwès di s'payis ou dè monde, çouchal n'èsteût nin co 'ne fâte. De-l'minme manîre, on n'è-l'pôre puni pus fwèrt qu'i n'l'âreût stu å moumint wice qui l'afêre s'a passé.

Artike dozinme (12)

Nouk ni pôrè aler hêrer s'narène divins l'vicârèye, li famille d'in-ôte, broki è s'mohone ou bin nahî d'vins sès lètes èt sès papîs, ni l'ac'sûre divins si-oneûr ou s'reputâcion. Chaskeun' a l'dreût d'esse protéjé dè lwès disconte dè s'fètès manîres.

Artike trazinme (13)

1. Chaskeun' a l'dreût d'aler tot wice qu'i vout d'vins 'n-Etat èt d'î tchûzi come i vout l'plèce la qu'i vout d'mani.
2. Chaskeun' a l'dreût dè qwiter tot l'minme dué payis, minme li sonk, èt dè raler è s'payis qwand i li plèt.

Artike catwazinme (14)

1. S'il èst k'tchèssî, chaque ome a l'dreût dè cwèri a s'ahouter èt dè trover on ratrèt divins dès-ôtes payis.
2. On n'si pout nin chervi di ç'dreût la s'on-z-èst porsûvou po 'ne mâcule qui li lwè réprouve ou po dès keûres qui vont disconte çou qu'lès Nâcion-Unies volèt mète èn-avant.

Artike qwinzinme (15)

1. Chaskeun' a l'dreût a 'ne nacionâlitè.
2. On n'pout r'prinde a nolu, èt sins rêzon, si nacionâlitè, tot comme si dreût d'ennè candjî.

Artike sazinme (16)

1. Si vite qu'enn'ont l'adje, ome èt feume, di tot l'minme quèle race, nacionâlitè ou r'lidjon, ont l'dreût di s'marier èt dè fonder 'ne famille. Il ont lès minmes dreûts po çou qu'enn'èst dè marièdje, tant qu'i sont mariés ou s'i m'nèt a d'vôrcer.
2. Li marièdje ni s'pout fé qui dè-l'plinne vol'té èt dè-l'tchûze dès cis qu's'ont promètou lès-acwèrdances.
3. Li famille c'èst l'vrêye fondemint dè-l'société, li r'vint l'dreût d'ine prôtècion dè-l'société èt d'l'Etat.

Artike disètinme (17)

1. Tot l'monde, seûye-t-i a lu tot seû ou bin avou dès-ôtes, a l'dreût d'aveûr dès bins.
2. On n'pout r'prinde sès bins a nolu, sins bone rêzon.

Artike dihûtinme (18)

Chaskeun' a l'dreût dè tûzer çou qu'i vout, d'aveûr si consyince por lu èt dè priyî tot l'minme qué Bon Diu, çoula vout dire ossu qu'i pout candjî di r'lidjon ou bin candjî d'idèye. Tot seû ou bin avou dès k'pagnons, è s'mohone to come å d'fou, i pout dire tot hôt çou qu'i creût, l'aprinde às-èfants, tot come ènnè fé-ârèmus ou lès cérimon'rèyes.

Artike dî-noûvinme (19)

Chaskeun' a l'dreût d'sès-opinions èt l'libèrté d'èlzès d'ner a k'nohe, çou qui vout dire qu'on nè-l'pôre toûrmèter po çou qu'i tûze èt qu'i pout cwèri sins rat'na lès informâcions come lès idèyes, ènnè r'çure èt 'nnè ripåde lådje èt lon, minme foû payis, èt di tot l'minme quèle manîre.

Artike vintinme (20)

1. Chaskeun' a l'dreût di s'rapoûler ou d's'acolèber po 'ne bone câse.
2. Nolu n'pout-èsse fwèrci dè fé pârtèye d'ine associâcion.

Artike vint-euninme (21)

1. I r'vint a chaskeun' li dreût dè prinde si pârt po çou qu'enn'èst dè tinre li vièrna di s'payis, seûye-t-i dirèctèmint, ou bin tot tchûzihant libèrèmint dès r'pruzintants.

2. Chaskeun' a l' minme dreût dè prinde on posse divins l' administråcion dis s' payis.

3. Li vol'té dè peûpe c'èst l' fondemint dè pouvwèr d' on gouvèrnumint; cisse vol'té-là si deût d' ner a k' nohe divins dès-èlèc'cions qui sùvèt l' dreût dè djeû, qu' on deût adjèrci a tchoke, avou l' sufradje ûniversèl : in-ome ine vwè, èt å vôte sècrèt, ou di tot l' minme quèle ôte manîre qui rèspeceye li liberté dè ci qui deût d' ner s' vwès.

Artike vint'deûzinme (22)

Chaskeun' come mambe dè-l' sôciété, a dreût a-l' sécurité sociåle; èlle èst fondêye po qu' l' ome åye çou qu' a dandji po s' dignité come po frudji d' cwèr èt âme. Chaque pays deût fé çou qu' i pout sorlon sès richesses èt si-organisåcion, mins s' deût-i poleûr compter ossu so on còp di spale dès-òtès nâcions.

Artike vint'treûzinme (23)

1. Chaskeun' a l' dreût d' ovrer, dè tchûzi l' mesti qu' li plèt, dè-l' fé divins dès bonès condicions èt d' èsse aasûré disconte li chômedje.

2. Turtos on dreût, sins nole diférince, a on minme salère po on minme ovrèdje.

3. Tos lès cis qu' ovrèt on l' dreût d' èsse payis d' tèle sòrt qu' il åyèsse assez po viker èt po fé viker leû famille, sins qwè èlzi r'vinrè dè toucherd' ine manîre ou d' ine ôte, ine sacwè d' pus' qui çou qu' gâgnèt.

4. Chaskeun' a l' dreût d' èmantchi avou dès-otes dès syndicats èt d' fé pàrtèye d' on syndicat po disfinde sès-intérêts.

Artike vint'cwatrinme (24)

Chaskeun' a l' dreût di s' ripwèzer èt dè prinde dè bon tins. Insi n' deût-on nin l' oblidi d' ovrer a fwèce sins r' las èt fou mèzeûre èt li r'vint-i dès condjîs payis å bout d' on tins.

Artike vint'cinquinme (25)

1. Chaskeun' a l' dreût dè gâgni assez po s' poleûr sognî èt-z-aveûr bon, por lu-minme èt s' famille, insi po çou qu' ènn' èst dè magnî, di s' moussi, di s' lodji, dè payî l' docteur èt l' apoticåre ou bin lès chervices qu' ènn' a dandji. Chaskeun' a l' dreût a-l' sécurité s' il èst sins-ovrèdje, malåde, invalide, vèf, qwand i d' vint vî ou qwand i n' a pus nole rintrêye di çans' la qu' ci n' èst nin di s' fâte.

2. Les mames èt lès-èfants ont pôr li dreût d' èsse êdis. Tos lès-èfants, qu' i sèyèsse vinous å monde di djins mariés ou fou dè sacrumint divèt-èsse protégés dè-l' minme manîre.

Article vint'sîhinme (26)

1. Chaskeun' a l' dreût d' aler è scole. Li scole ni deût rin coster, dè mons po çou qu' ènn' èst dès p'titès scoles la qu' tot l' monde deût-èsse oblidi d' aler. On deût trover tot-avå dès scoles tècniques èt profèssionèles ; tot l' monde so-l' minme pîd deû poleûr fé dès hôtes-études sorlon sès mérites èt sès quâlités.

2. L' educåcion deût permète a chaskeun' dè fé frudji sès capâcités èt deût rinde pus fwèrt li rèspeç dè dreûts d' l' ome èt dès prumîrès libertés. Ele deût aminer les djins di tot l' minme quèle race ou r' lidjon, lès peûpes èt lès nâcions, a s' mî comprinde èt s' supwèrter, tot fant hôte avou lès Nâcions-Unies po çou qu' èst dè garanti l' pâyê.

3. C'è-st-å prumî rang ås parints qu' i r'vint dè tchûzi l' mèyeuse sicole po leûs-èfants.

Artike vint'sètinnme (27)

1. Chaskeun' a l' dreût dè prinde libremint pàrt a çou qui fèt l' vèye culturèle dè-l' comunôté, dè profiter dès-ârts èt dè prinde pàrt ås progrès dè-l' syince èt tot çou qu' aminèt d' bon.

2. Chaskeun' a l' dreût dè veûy garanti sès-intérêts po dès-ôuves di syince, di scriyèdje ou d' ârtisse, qu' ènnè l' ôteur.

Artike vint'ûtinme (28)

C'è-st-on dreût po chaskeun' qui l'monde rote di tèle manîre qui, po 'ne classe ou l'ôte dè-l'société come d'on payis a l'ôte, lès dreûts èt lès libertés qui s'trovèt chal rachous si polèsse mète èn-alèdje.

Artike vint'noûvinme (29)

1. L'ome a dèd dvwèrs po l'communoté wice qu'i pout dègn'mint crèhe èt viker.
2. Po çou qu'enn'est d'sès dreûts èt d'sès libertés, chaskeun' divrèt d'morer d'vins lès-arôyes qui li lwè a mètou d'jusse po garanti li rik'nohance èt l'rèspèt dèd libertés dèd-ôtes, dè-l'moråle, dè-l'tranquilité èt dè-l'binâhisté d'turtos divins 'ne sôciété d'démocrâtes.
3. Cès dreûts èt cès libertés-la ni spôront mây mète come dèd hames è-l'vôye di çou qu'volèt fé lès Nâcions-Unies.

Artike trintinme (30)

Rin di tot çou quis'trouve divins cisse Dèclarâcion-chal ni pout d'ner a tûzer d'in-Etat ou d'ine sakî, qu'il a l'dreût dè fé tot l'minme qwè qui pôreût mète a må lès dreûts èt lès libertés qu'î sont rachous.
